

# Bebe e Remedi Preskribí

Ku regularidat por tende deklarashonnan ku kos no ta kana bon na nos islanan pasobra nos komunidad a pèrdè e normanan i balornan di antes. Tantu den kombersashonnan privá komo charlanan públiko, por tende e mésun kansion entitulá, “Rekobra nos normanan.” Irespekto di e kantante òf melodia, kasi semper e líriko ta mensioná e dekadensia aktual, balornan di antes, i duele ku nan ta bai pèrdí.

Maske e palabranan por ta korekto i na nan lugá, tòg den muchu kaso nan ta zona bashí den nos oído. Algu ta hasi falta. Echu ta ku **deklarashonnan asina por ta un kapa (talbes inkonsiente) pa evitá responsabilidat personal** den e situashon aktual. Ripará dos kapa:

1) **E kapa di komunidad.** Nos por enfatisá ku hopi fervor ku nos *komunidad* mester rekobra su normanan i balornan. Ma nos por prediká e mensahe aki pa síglonan largu sin mira ningun kambio tanten ku nos no ta realisá ku un komunidad ta konsistí di *personanan individual*. Un komunidad por rekobra su normanan i balornan solamente ora personanan ta apliká e normanan i balornan pèrdí. **Tirando kulpa riba e komunidad, ta un manera pa skapa responsabilidat personal.** Den sierto sintido, si nos tur (kolektivamente) ta kulpabel, anto ningun di nos (individualmente) ta kulpabel.

Esnan ku ta proklamá ku nos *komunidad* mester rekobra su normanan i balornan por splika kon esaki mester sosodé apart di personanan individual? Nan ta deseá pa e komunidad tene un manifestashon masal? Nan ta visualisá ku e delaster ansiano, adulto, hóben i mucha mester protestá ku un bos unánimo? Of nan ta imaginá ku mester bin un lei: “Desde e dia aki padilanti, nos tur lo biba segun e normanan i balornan di aña 1950”?

Nos lo no rekobra su normanan i balornan, dor di generalisá. Mustrando un dede akusante riba e komunidad no ta solushoná nada. Por tin kambio solamente ora bo ta muestra e dede den bo mes direkshon, **tumando responsabilidat personal pa biba conforme e normanan i balornan ku Dios ta deseá.**

2) **E kapa di otro hende.** Algun hende, bulando pipa pa nan responsabilidat personal pa apliká sierto norma i balor, ta pone responsabilidat riba skouder di un òf otro líder pa trese kambio den nos komunidad. Suidadanonan ta pusha e tarea pa gobernantenan i polis pa inisiá kambio. Parokianonan ta haña ku ta pastor su trabou. Mayornan ta opiná ku ta tarea di dosentenan, i na mésun tempu yùfrou ta para riba ku ta responsabilidat di e tata i mama. Pues, kada un ta muestra dede riba otro, mientras **poko ta despuesto pa ahustá nan mes bida na e normanan i balornan tan deseá.** Kon ta pusíbel ku pa tin kambio asina?

Den muchu kaso, esun ku ta proklamá ku nos komunidad mester rekobra e normanan di balornan di antes, ta deseá pa **otro hende** apliká nan palabranan, **ma nan mes no ta despuesto pa hasié.** Tin un distansia enorme entre loke nan ta prediká i loke nan mes ta praktiká. E mensahe ku nan ta komuniká bon kla ta, **“Hasi loke mi ta bisa, no hasi loke mi ta hasi!”**

Unda ta e lídernan den nos komunidad ku lo tuma responsabilidat personal pa biba riba un nivel di étika haltu? Unda ta esnan ku lo reta habitantenan di nos islanan pa hiba bidanan responsabel i moral **i ta duna un bon ehèmpel pa sigui?** Tin un skaresdat di líder den nos komunidad ku ta despuesto pa bisa umildemente, “Sigui mi ehèmpel!”

No ta un kos di orguyo pa *bisa* i *mustra* hende kon pa biba. Rípitidamente apòstel Pablo a bisa hende pa no solamente skucha su palabranan, ma tambe sigui su ehèmpel. El a bisa: “...sea imitadónan di mi meskos ku ami tambe ta di Cristo”; “...sigui mi ehèmpel...”; “e kosnan ku boso a siña i a risibí i a tende i a mira den mi, praktiká e kosnan aki...” (1 Korintionan 4:16; 11:1; Filipensenan 3:17; 4:9).

Sin duda **hende ta siña muchu mas mihó dor ehèmpel,** no dor palabranan so. Nos mester sigui enfatisá e nesidat pa normanan i balornan sano na nos islanan. Ma e mensaha lo ta muchu mas komprendíbel ora e ta bin di boka di hende ku ta tuma nan responsabilidat personal na serio pa biba loke nan ta bisa, hende ku ta bebe e remedi ku nan mes ta preskribí.